

TOK SAVE

BIHAINIM
LAIK BILONG YU

BIHAINIM LAIK BILONG YU

Yu ken bihainim laik bilong yu. God i larim Em yet long han bilong yu. God i givim Em yet long han bilong man. Taim God i salim Jisas Kraist i kam daun long graun, Em i kam olsem God na man, na i putim Em yet long han bilong ol man. Ol i tok nogut long em, paitim em, spetim em, kolim em devel, inap ol i kisim em na givim daiwai kros long em i karim na ol i nilim em namel long heven na graun. God i larim ol. Yu ken mekim olsem sapos yu laik. Tru Kraist i no stap long bodi. Yu ken givim baksait long em. Yu ken givim baksait long Buk bilong em (Baibel). Yu ken givim baksait long sios bilong em. Yu ken lap long rot bilong Kraist i kapsaitim blut bilong kisim bek yu. Yu ken lap long hel, em i orait. Kraist bilong stap oltaim i paitim dua long bel bilong yu, na askim yu long tanim bel na redi long heven. Yu ken sakim tok bilong em, sapos yu laik. Yu ken tok bilas na spetim na paitim em na kolim nating Nem Bilong Em. God i larim Em yet long han bilong yu—nau.

Tasol long narapela rot yu ken mekim olsem. Opim bel bilong yu na singautim Kraist ikam long laip bilong yu na lusim sin bilong yu na klinim bel bilong yu. Jisas i tok, *"Harim, mi sanap long dua na mi wok long paitim i stap. Sapos wanpela man i harim maus bilong mi na opim dua long mi, bai mi kam insait na kaikai wantaim em na em i kaikai wantaim mi."* Rev. 3v20

Yu makim laik bilong yu. Yu laikim ol kain kain pati na amamas bilong graun tasol, o yu laik painim bel isi wantaim God? God i stap long han bilong yu. Em i olsem, God tu i makim pinis wanpela de, bai yu pundaun insait long han bilong em. Wanem bai God i mekim long yu, em bai kisim skel bilong nau yu mekim wanem long God. Bai i samting nogut tru, long taim yumi man bai i go aninit long bel hat bilong God. Sapos yu givim baksait long em nau, bai God i gat wanpela long ol tupela tok hia long tokim yu. *"Yu klia long mi, mi no save long yu,"* o *"Welkam, yu kam insait na amamas, yu gutpela wokman."* Matyu 25v21 n Matyu 25v41

Jisas em i ples hait tru long de bilong kot bilong God. Em i wanpela ples hait tasol. Aposel 4v12. Jisas Kraist em i rot God i makim long kisim bek yumi. Yumi nogat rot long i go long God o long Heven ausait long Jisas Kraist. Kraist i wok yet long Holi Spirit bilong em na oltaim i toktok long spirit na tingting bilong yumi. Yu ken makim ol samting bilong graun, tasol bai yu bagarap. Yu ken pulim taim i go, tasol, long ai bilong God taim yu pulim taim i go, em i olsem yu pinis. Yu les pinis olgeta long em. Em nau i taim bilong yu yet yu makim rot. God istap long han bilong yu. Tru tumas i nogat namel ples, namel long Hel na Heven, i nogat ples malolo. Sapos yu laik kisim laip wantaim God em yu mas kisim nau. Marimari bilong God i wetim yu nau.